



Broj: 02-02-2146-2/26

Velika Kladuša, 11.08.2026. godine,

Na osnovu člana 8. Odluke o finansiranju i sufinansiranju projekata organizacija civilnog društva („Službeni glasnik Općine Velika Kladuša“, broj: 9/26), člana 34. Pravilnika o kriterijima, načinu vrednovanja, monitoringu, evaluaciji i nadzoru projekata organizacija civilnog društva koji se finansiraju i sufinansiraju iz Budžeta Općine Velika Kladuša, te člana 43. Statuta Općine Velika Kladuša („Službeni glasnik Općine Velika Kladuša“, broj: 11/12), Općinski načelnik Općine Velika Kladuša, objavljuje

JAVNI POZIV

**za finansiranje i sufinansiranje projekata organizacija civilnog društva (OCD),
odnosno nevladinih i neprofitnih organizacija
iz Budžeta Općine Velika Kladuša za 2026. godinu**

I PREDMET JAVNOG POZIVA

Predmet ovog Javnog poziva je dodjela finansijskih sredstava iz Budžeta Općine Velika Kladuša za 2026. godinu organizacijama civilnog društva, odnosno udruženjima i fondacijama koje djeluju na području općine Velika Kladuša ili realizuju projekte od neposrednog interesa za građane Općine Velika Kladuša.

Općina Velika Kladuša ovim Javnim pozivom želi osigurati transparentnu, konkurentnu, pravičnu i objektivnu raspodjelu budžetskih sredstava u skladu sa principima dobrog upravljanja, odgovornog korištenja javnih sredstava, jednakog tretmana svih podnosilaca prijava, zabrane diskriminacije, sprečavanja sukoba interesa i osiguranja najveće moguće društvene koristi od finansiranih projekata.

Sredstva iz ovog Javnog poziva dodjeljuju se isključivo za projekte čiji rezultati imaju direktan ili indirektan pozitivan uticaj na građane Općine Velika Kladuša.

II UKUPAN FOND SREDSTAVA

Za realizaciju ovog Javnog poziva u Budžetu Općine Velika Kladuša za 2026. godinu planirana su sredstva u ukupnom iznosu od **150.000,00 KM**.

Budžetska sredstva dodjeljuju se putem grantova organizacijama civilnog društva na osnovu ostvarenog broja bodova, raspoloživih budžetskih sredstava i konačne rang liste.

Minimalan iznos sredstava koji se može dodijeliti po jednom projektu iznosi: **3.000,00 KM**

Maksimalan iznos sredstava koji se može dodijeliti po jednom projektu iznosi: **10.000,00 KM**

Komisija zadržava pravo da, u postupku ocjenjivanja, predloži dodjelu manjeg iznosa sredstava od traženog ukoliko ocijeni da pojedine budžetske stavke nisu opravdane, nisu u skladu sa planiranim aktivnostima ili prelaze tržišne vrijednosti. U tom slučaju podnosilac prijave može prihvatiti predloženi iznos ili odustati od finansiranja projekta.

Neiskorištena sredstva, kao i sredstva koja ostanu nakon odustajanja korisnika ili sredstva vraćena zbog raskida ugovora mogu se rasporediti narednim projektima sa konačne rang liste koji ispunjavaju uslove za finansiranje.

III CILJEVI JAVNOG POZIVA

Opći cilj Javnog poziva jeste unapređenje kvaliteta života građana Općine Velika Kladuša kroz podršku kvalitetnim projektima organizacija civilnog društva koji doprinose razvoju lokalne zajednice.

Posebni ciljevi Javnog poziva su:

- jačanje kapaciteta organizacija civilnog društva;
- razvoj partnerstva između javnog i civilnog sektora;
- unapređenje društvene solidarnosti i socijalne uključenosti;
- povećanje učešća građana u društvenom životu;
- unapređenje položaja djece, mladih, žena, osoba treće životne dobi i osoba sa invaliditetom;
- razvoj sportskih, kulturnih i obrazovnih sadržaja;
- promocija zdravih stilova života;
- unapređenje zaštite okoliša i održivog razvoja;
- razvoj volonterizma i građanskog aktivizma;
- jačanje međusobne saradnje organizacija civilnog društva;
- unapređenje transparentnosti i odgovornosti u korištenju javnih sredstava.

Prilikom ocjenjivanja projekata posebna pažnja posvetit će se projektima koji ostvaruju dugoročne efekte, uključuju veći broj korisnika, osiguravaju održivost rezultata nakon završetka projekta i podstiču saradnju između više organizacija ili institucija.

IV PRIORITETNE OBLASTI FINANSIRANJA

Sredstva iz ovog Javnog poziva dodjeljuju se isključivo za projekte koji se odnose na jednu ili više sljedećih prioritarnih oblasti:

1. KULTURA I UMJETNOST, maksimalan iznos sredstava **30.000,00 KM**;

1.1. Projekti kulturnog i kreativnog stvaralaštva za sve kategorije stanovništva;

1.2. Projekti koji poboljšavaju kvalitet i dostupnost kulturo-zabavnih sadržaja za sve kategorije stanovništva kroz promociju različitih vidova kulture, umjetnosti, kulturno-umjetničkog amaterizma i volonterizma;

1.3. Promocija umjetničkog stvaralaštva na području općine.

2. OBRAZOVANJE, maksimalni iznos sredstava **25.000,00 KM**;

2.1. Projekti iz oblasti neformalnog obrazovanja, razne edukacije i radionice iz svih oblasti društvenog života (organizovanje edukativnih radionica, treninga, kampnja u cilju podizanja svijesti o važnosti cjeloživotnog učenja);

2.2. Projekti edukacija i radionica iz oblasti IT tehnologija (napredne edukacije iz oblasti IT-a, programiranje, multimedija, 3D dizajn, kreiranje i održavanje mobilnih aplikacija, IT administracija idr.) i stranih jezika.

3. **SOCIJALNA ZAŠTITA I LJUDSKA PRAVA**, maksimalni iznos sredstava **50.000,00 KM**;

3.1. Projekti koji unapređuju kvalitet i dostupnost edukativnih, kulturnih, sportskih i sportsko-rekreativnih sadržaja za djecu i mlade, sa posebnim akcentom na djecu sa poteškoćama u razvoju;

3.2. Projekti koji doprinose unapređenju kvaliteta života, rehabilitaciji, socijalnoj uključenosti i podršci osobama sa invaliditetom, hronično i teško oboljelim licima te članovima njihovih porodica;

3.3. Projekti usmjereni na unapređenje javnog zdravlja, preventivnu zdravstvenu zaštitu, rano otkrivanje bolesti, promociju zdravih stilova života, zdravstvenu edukaciju stanovništva, te pružanje podrške oboljelim licima i drugim ranjivim kategorijama društva:

- pokretni mamograf,
- preventivni pregledi,
- akcija ranog otkrivanja karcinoma,
- edukacija o zdravlju,
- podrške onkološkim, dijabetičkim i drugim teško oboljelim pacijentima, i
- aktivnosti na očuvanju zdravlja stanovništva.

3.4. Projekti usmjereni na jačanje socijalne inkluzije, humanitarnu podršku i unapređenje položaja socijalno ugroženih i drugih ranjivih kategorija stanovništva;

3.5. Projekti prevencije nasilja u porodici i društvu, maloljetničke delinkvencije, svih oblika ovisnosti, promocije mentalnog zdravlja i razvoja sigurnog i zdravog društvenog okruženja.

4. **OKOLIŠ I ENERGETSKA EFIKASNOST**, maksimalni iznos sredstava **20.000,00 KM**;

4.1. Projekti koji promovišu odgovoran odnos prema prirodi i unapređenju kvaliteta življenja, te energetske efikasnost i racionalno korištenje energije;

5. **GENDER**, maksimalni iznos sredstava **10.000,00 KM**;

5.1. Projekti koji se tiču edukacije građana o ravnopravnosti spolova i zabrani diskriminacije;

5.2. Projekti usmjereni na ekonomsko osnaživanje žena, posebno žena iz ruralnih područja i drugih ranjivih kategorija;

5.3. Projekti usmjereni na prevenciju rodno zasnovanog nasilja, podizanje svijesti javnosti i informisanje o dostupnim oblicima zaštite i podrške žrtvama;

6. **MLADI I VOLONTERIZAM**, maksimalni iznos sredstava **15.000,00 KM**;

6.1. Projekti podrške mladima i omladinskim organizacijama kroz projekte koji doprinose poboljšanje položaja mladih u lokalnoj zajednici, kao i podrška radu i djelovanju mladih u Velikoj Kladuši shodno Zakonu o mladima FBiH.

6.2. Projekti koji imaju za cilj unapređenje omladinskog aktivizma, volonterizma i odgovaraju na potrebe mladih.

Prednost će imati projekti koji doprinose realizaciji strateških ciljeva Općine Velika Kladuša, ostvaruju mjerljive rezultate, uključuju veći broj korisnika i stvaraju trajne koristi za lokalnu zajednicu.

V PRAVO UČEŠĆA I KRITERIJI

Pravo na dodjelu finansijskih sredstava po ovom Javnom pozivu imaju organizacije civilnog društva (udruženja i fondacije) koje ispunjavaju sljedeće opće i posebne uvjete.

Opći uvjeti:

- da su osnovane i registrovane u Bosni i Hercegovini;
- da uredno ispunjavaju obaveze plaćanja poreza i doprinosa;
- da se protiv podnosioca prijave, odnosno lica ovlaštenih za zastupanje i voditelja programa ili projekta, ne vodi krivični postupak i nije pravosnažno osuđen za prekršaj ili počinjenje krivičnog djela;
- da svoje aktivnosti razvijaju na području općine Velika Kladuša
- da su projekti namijenjeni građanima općine;
- da se projekti odnose na oblasti koje su definisane javnim pozivom;
- da organizacije ne obavljaju bilo kakvu aktivnost u ime političke partije;
- da su organizacije koje su od općine dobile finansijska sredstva po prethodnom javnom pozivu ispunile obavezu podnošenja izvještaja o utrošku sredstava uz finansijsku dokumentaciju kao i narativni izvještaj

Posebni uvjeti:

- usklađenost ciljeva projekata sa ciljevima i prioritetnim oblastima iz strateških dokumenata iz kojih su izvedeni prioriteti za dodjelu sredstava,
- kvaliteti i relevantnosti prijave projektnog prijedloga,
- organizacione i finansijske kapacitete podnosioca prijave,
- dosadašnje iskustvo podnosioca i provođenju istih ili sličnih projekata,
- učešće drugih partnera u realizaciji kroz sufinansiranje projekata, njihovi kapaciteti i dosadašnja iskustva (ukoliko su predviđeni pozivom)
- procenat vlastitog učešća
- kvalitet planiranih aktivnosti i metode provođenja, te njihova povezanost sa problemima koji su bili osnov za utvrđivanje prioriteta, a koji se nastoje riješiti provođenjem projekta,
- razrađen/specifičan budžet projekta prema obrascu za prijavu projektnog prijedloga.

Na Javni poziv ne mogu aplicirati: Političke partije, vjerske organizacije i zajednice (osim za projekte koji imaju isključivo širi društveni, humanitarni ili kulturni karakter u skladu s prioritetima), javne ustanove, privredni subjekti, te organizacije koje su u stečaju ili likvidaciji.

VI OBAVEZNA I PRATEĆA DOKUMENTACIJA

Podnosioci prijave dužni su dostaviti kompletnu aplikacijsku datoteku koja sadrži obaveznu projektnu dokumentaciju i prateću pravno-finansijsku dokumentaciju.

A. Obavezna projektna dokumentacija (Aplikacioni obrasci):

1. Projektni prijedlog (popunjen na službenom obrascu);
2. Prijedlog budžeta (izražen u KM, sa jasno definisanim troškovima) ;
3. Logički okvir rada;
4. Plan aktivnosti i promocije;
5. Administrativni podaci o podnosiocu;
6. Finansijska identifikaciona forma (potpisana i ovjerena);

7. Izjava o podobnosti ;
8. Izjava o partnerstvu ili osiguranim sredstvima (ukoliko se projekt realizira u partnerstvu ili uključuje sufinanciranje iz drugih izvora);
9. Lista za provjeru.

B. Prateća dokumentacija (kopije ili originali u skladu sa Smjernicama):

- Statut NVO/OCD (kopija)
- Izvod iz registra udruženja izdatog od nadležnog ministarstva, ne starije od 3 mjeseca (original ili ovjerena kopija)
- Identifikacioni broj iz registra poslovnih subjekata (ID broj i Obavijest o razvrstavanju);
- Završni račun za prethodnu poslovnu godinu (bilans stanja i bilans uspjeha za prethodnu 2025. godinu – kopija verificiranog dokumenta)
- Izvještaj o radu i finansijski izvještaj sa dokazima o namjenskom utrošku sredstava po Javnom pozivu (kopija ranije dostavljenog narativnog i finansijskog izvještaja)
- Uvjerenje o izmirenim doprinosima za zaposlene, ako ima zaposlenih u organizaciji (ako nema zaposlenih priložiti ovjerenu izjavu da nema zaposlenih)
- Originalna potvrda Porezne uprave F BiH i Uprave za indirektno oporezivanje BiH (ne starija od 30 dana od dana objave jpoziva) o izmirenim poreskim obavezama
- Dokaz o postojanju adekvatnih ljudskih, tehničkih i prostornih resursa (biografije ključnog osoblja i opis dosadašnjih realizovanih projekata iste ili slične složenosti);
- Dokaz da su obezbjeđena vlastita sredstva ili sredstva od donatora za dio projekta koji se predlaže;
- Dokaz da se protiv organizacije, lica ovlaštenog za zastupanje i voditelja projekta ne vodi krivični postupak. Dostavlja se uvjerenje nadležnog suda (ili da dokaz budu ovjerene izjave)
- Da nisu pravosnažno osuđeni za prekršaje ili krivična djela. Dostavlja se uvjerenje nadležnog MUP-a/Suda
- Uvjerenje o poreznoj registraciji (identifikacijski broj);

VII NEPRIHVATLJIVI TROŠKOVI

Sredstva ostvarena putem ovog Javnog poziva ne mogu se koristiti za:

- Dugovi, kamate, gubici ili rezerve za buduće potencijalne gubitke;
- Troškovi koji se već u potpunosti finansiraju iz drugih javnih izvora (stroga zabrana višestrukog/dvostrukog finansiranja);
- Kupovina nekretnina, zemljišta ili izgradnja objekata (osim ukoliko pozivom eksplicitno nije odobren namjenski kapitalni transfer);
- Kazne, finansijski penali i troškovi sudskih postupaka;
- Komercijalne aktivnosti usmjerene na sticanju dobiti za članove udruženja.

VIII EVALUACIJA I OCJENJIVANJE PRIJAVA

Postupak ocjenjivanja i odabira projekata provodit će Komisija za ocjenjivanje i odabir projekata, koju imenuje Općinski načelnik. Komisija će vršiti evaluaciju prispjelih prijava u dvije faze:

1. Administrativna selekcija: Provjera blagovremenosti, potpunosti dokumentacije i ispunjenosti općih i posebnih uvjeta podobnosti na temelju Liste za provjeru.
2. Evaluacija: Ocjenjivanje projektnih prijedloga vršit će se u skladu s kriterijima utvrđenim u Pravilniku i Smjernicama (relevantnost projekta, metodologija, budžet i troškovna učinkovitost, održivost i kapaciteti organizacije).

Rezultati Javnog poziva (Privremena rang lista) bit će objavljeni na službenoj web stranici Općine Velika Kladuša www.velikakladusa.gov.ba.

IX NAČIN, ROK I MJESTO PREDAJE PRIJAVA

Aplikanti moraju predati jedan (1) printani primjerak aplikacije (original) i jednu elektronsku verziju (CD ili USB medij na kojem su dokumenti sačuvani u Word i/ili Excell formatu), spakovane u zatvorenu kovertu.

Prijave se dostavljaju preporučenom poštom ili lično u zgradu Općine Velika Kladuša – kancelarija pisarnica, na slijedeću adresu:

Općina Velika Kladuša
Ulica Hamdije Pozderca br. 3, 77230 Velika Kladuša
s naznakom:

"PRIJAVA NA JAVNI POZIV ZA OCD IZ BUDŽETA ZA 2026. GODINU – NE OTVARATI"

Rok za predaju prijava je **15 (petnaest) dana** od dana raspisivanja javnog poziva.

Prijave podnesene nakon isteka roka, nepotpune prijave, kao i one koje nisu dostavljene na propisanim obrascima ili nisu u skladu s uvjetima Javnog poziva, Komisija neće uzeti u razmatranje.

Organ ne podliježe vraćanju dostavljene dokumentacije na NVO/OCD kojima su odobreni ili nisu odobreni projektni prijedlozi.

X POSTUPAK RJEŠAVANJA PRIGOVORA

U cilju zaštite prava podnositelja prijava, osiguranja transparentnosti i zakonitosti postupka, podnositelji projektnih aplikacija imaju pravo na podnošenje prigovora u dvije faze postupka:

1. Prigovor na rezultate administrativne selekcije (tehničke ispravnosti):

- Podnosioci prijave čije aplikacije ne prijeđu fazu administrativne selekcije (nepotpune, neblagovremene prijave ili prijave koje ne ispunjavaju opće eliminatorne uvjete) bit će pismeno obaviješteni uz navođenje jasnih razloga odbacivanja.
- Protiv rješenja/obavještenja o odbacivanju prijave u ovoj fazi, podnosilac ima pravo izjaviti prigovor Općinskom načelniku u roku od 8 (osam) dana od dana prijema pismene obavijesti.

2. Prigovor na rezultate evaluacije (Privremena rang lista):

- Nakon završetka ocjenjivanja tehničko-ispravnih projekata od strane Komisije, na službenoj web stranici Općine Velika Kladuša bit će objavljena Privremena rang lista.
- Nezadovoljni aplikanti mogu objaviti prigovor na Privremenu rang listu u roku od 8 (osam) dana od dana njene službene objave na web stranici Općine.
- Prigovor se podnosi isključivo u pismenoj formi, putem Protokola (Pisarnice) Općine Velika Kladuša ili preporučenom poštom na adresu definiranu u Dijelu IX ovog Javnog poziva, sa naznakom: *"Prigovor na rezultate Javnog poziva za OCD – Komisiji za rješavanje prigovora"*.
- Prigovor mora biti obrazložen i sadržavati tačne argumente, dokaze ili pokazatelje na kojima se temelji. U postupku po prigovoru ne mogu se dostaviti novi, dodatni dokumenti koji su propušteni u izvornoj prijavi.

3. Odlučivanje po prigovorima i donošenje konačne odluke:

- Za rješavanje prigovora Općinski načelnik imenuje posebnu, nezavisnu Komisiju za prigovore (čiji članovi nisu sudjelovali u radu Komisije za ocjenjivanje i odabir projekata), čime se u potpunosti vrši razdvajanje ključnih funkcija i sprječava sukob interesa.
- Komisija za prigovore dužna je razmotriti sve blagovremene prigovore i dostaviti obrazložen prijedlog odluke Općinskom načelniku.

- Rok za rješavanje po prigovorima i donošenje odluke iznosi maksimalno 15 (petnaest) dana od dana isteka roka za podnošenje prigovora.
- Nakon što se riješe svi prigovori, Općinski načelnik donosi konačnu Odluku o dodjeli sredstava, na temelju koje se objavljuje Konačna rang lista na web stranici Općine, čime je postupak rješavanja po prigovorima pravosnažno okončan.

XI DODATNE INFORMACIJE

Smjernice za aplikante sa detaljnim informacijama o postupku prijave, kriterijima ocjenjivanja, kao i kompletna aplikaciona datoteka (obraci), mogu se preuzeti na zvaničnoj web stranici Općine Velika Kladuša: www.velikakladusa.gov.ba na poveznici/linku javnog poziva.

Pitanja u vezi sa javim pozivom mogu se postaviti putem e-mail adrese: jasna.topcagic@velikakladusa.gov.ba ili jasmin.sahinovic@velikakladusa.gov.ba sa naznakom za Javni poziv NVO/OCD 2026 Općina Velika Kladuša.

Pitanja se mogu postavljati tokom cijelog perioda Javnog poziva. Odgovori na upite bit će dostavljeni u elektronskoj formi odnosno na prigodan način unutar 3 (tri) radna dana od primitka upita, shodno Smjernicama koje su sastavni dio priloga ovog Javnog poziva.

Akt obradio:

Šahinović Jasmin, mag.pol.

Dostavljeno:

1. Služba za upravu, društvene djelatnosti i zajedničke poslove
2. RVK, i
3. A/a;

